

ratus, cum intentione alias redeundi et confessionem perficiendi, et putat id sufficere ut a culpa gravi eximatur. 3º Accedit quidem plures tempore debito, sed prava consueludine detinetur, nec sufficienter emendationis signa præbens, qua de causa ad aliud tempus experimenti gratia remittitur. 4º Alias tandem, etsi sat dispositus tempore opportuno accesserit, rogat Confessarium ut ad octo vel quindecim dies remittatur, quod ipsi ultra conceditur.

HINC :

QUÆR. 1º An, vel quomodo peccaverit LONGINUS in his casibus contra Ecclesiæ præceptum?

2º An in ultimo casu Confessarius illi absolutionem et Communionem differe potuerit?

SOLUTIO :

456. — R. ad 1<sup>m</sup> Quæs. 1º LONGINUS peccavit graviter *in primo casu*, quia tardius ad confitendum accessit. Etenim non satis est confessionem incipere ultima die temporis Paschalis, sed ipsa Communio hac die facienda est, si præcepto Ecclesiæ non adhuc satisfactum fuerit. Dilatio autem, etiam unius diei, gravis est, quia lex sub gravi obligans infringitur. 2º Peccavit quoque graviter *in secundo casu*, si emendationi studere insigniter neglexit. Etenim qui tenetur ad finem, tenetur ad media necessaria ad illum consequendum, ita ut graviter peccet qui hec adhibere omittit. Atqui dispositio ad absolutionem est res omnino requisita, ut quis ad Eucharistiam accedere possit: ergo hæc illi adhibenda erat. Ergo peccavit contra præceptum Eucharistiam sumendi tempore præscripto. 3º Peccavit etiam *in tertio casu*, propter rationem jam modo allatam, scilicet quia debebat se ad Sacramentum Pœnitentiæ disponere, tollendo impedimenta proxime impeditia legis execusionem: atqui prava cordis dispositio est impedimentum proxime impediens absolutionem et Eucharistiæ susceptiōnem. Ergo, etc. *Tamb. de tertio Præcepto Ecclesiæ*, c. 3. — 4º Non peccavit autem *in quarto casu*, quia dispositionibus requisitis ad absolutionem et Communionem non caruit, et dilationem postulando se judicio et beneplacito Confessarii commisit.

457. — R. ad 2<sup>m</sup> Quæs. Affirm. Confessarius enim est judex non solum dispositionis ad Communionem requisitæ, sed opportunitatis majoris ad SS. Sacramentum suscipiendum. Potest igitur aliquam dilationem permettere vel imponere, si judicet majus bonum pœnitentis id requirere, saltem si hic non sit invitus.

## CASUS VI.

### DE JEJUNIO 1º.

1º DIDYMUS de more jentaverat, septem vel octo uncias panis vel casei manducando, cum admonetur diem esse jejunii; nihilominus prandium solitum media die sumit, ratus non esse sibi omittendum quod omnibus est licitum. Imo cœna integra stomachum vespere reficit, ex eo quod jejunium mane violatum in integrum restitui non possit.

2º GABINUS, cum bona fide duplē refectionem die jejunii sumpsisset, advertens ad obligationem jejunandi, non tamen a tertia refectione abstinuit, quia jejunium jam violatum non amplius servari poterat.

HINC :

QUÆR. 1º In quo consistat jejunii essentia?

2º An DIDYMUS jejunium riolaverit, cœnam integrum sumendo?

Aut quid facere debuisset?

3º An duplex peccatum mortale commiserit?

4º An GABINUS in secundo casu graviter peccaverit, tertiam refectionem sumendo?

SOLUTIO :

458. — R. ad 1<sup>m</sup> Quæs. Essentia jejunii in hoc præcipue sita est, ut unica refectione proprie dicta fiat. Usus vero invaluit, ut præterea refectione cœnula sub vespere sumi possit.

459. — R. ad 2<sup>m</sup> Quæs. Peccavit graviter *per se* DIDYMUS duplē refectionem sumendo, præter jentaculum. Ipsa enim remanebat adhuc possibile jejunium, scilicet prandium ad vespertinum tempus remittendo, vel a cœnula abstinentio. Si refectionem transmittere noluerit aut non potuerit, et omnino abstinentia a cibo vespere nimis molesta esset, posset DIDYMO permitti ut aliquid cibi v. g. unam vel alteram unciam degustaret. Dixi *per se*, quia, si supradictis industriis minime uti potuit, tunc a jejunii lege fuit excusatus.

460. — R. ad 3<sup>m</sup> Quæs. Neg. Ratio est, quia unicum jejunii præceptum violavit; proinde unicum posuit actum contra obedientiam erga Ecclesiam. Igitur ille qui tres refectiones sumit die jejunii, non plura peccata gravia committit quam ille qui duplē tantum refectionem facit, siquidem unica est obligatio jejunii prætermissa.

461. — R. ad 4<sup>m</sup> Quæs. Controvertitur. Duplex est sententia *probabilis*, juxta S. Lig. n. 1030.

I<sup>a</sup> SENTENTIA negat GABINUM peccasse mortaliter, quia reapse ita violatum est jejunium ut ejus essentia destructa fuerit, licet ex inadvertentia id evenerit. *Ita Bonacina, — Elbel, — Sporer, etc.*

II<sup>a</sup> SENTENTIA affirms. Ratio est, quia jejunium *materialiter* tantum fregit, non vero *formaliter*. Quare, cum primum advertit ad legem jejunii, tenebatur illam servare, ne formaliter lœderet. *Ita Azor, — Sa, — Navarrus, etc.* Si vero GABINUS, detecto errore, consilium postulasset, sane adhortandus fuisset ut ab ulteriori refectione abstineret. *Recole dicta de leg. n. 87.*

## CASUS VII.

### DE JEJUNIO 2º.

PUBLICUS jejunavit quadragesimali tempore, modo prandium sumendo hora decima matutina, cœnulam vero hora septima vespertina; modo ordinem inversum sequendo. In refectione cœnula autem 8 vel 10, aut aliquando 12 uncias panis vel lactucarum, etc., deglutiit.

HINC :

- QUÆR. 1º An, vel qualis anticipatio aut inversio refectionis sit gravis?  
 2º Qualis sit quantitas permittenda in refectiuncula?  
 3º Qualis sit qualitas admittenda?

SOLUTIO :

462. — R. ad 1º Quæs. Stante consuetudine, vel accedente rationabili causa fieri potest cœnula versus meridiem, imo etiam versus horam decimam, et refectio vespere. Si hæc praxis neque consuetudine, neque justa causa justificari queat, non vacabit culpa, non gravi tamen, quia hæc transpositio non videtur essentiam jejunii afficere. An vero peccet graviter ille qui refectionem sumit hora decima matutina, vel decima cum di-midio? Affirmat S. Lig. cum aliis multis; negant alii cum Elbel et Layman, non improbabiliter. In praxi, priori sententiæ standum videtur, nisi legitima consuetudo aliud permittat.

463. — R. ad 2º Quæs. S. Lig., cum aliis, octo uncias cibi circiter permittit omnibus, et paulo amplius iis quibus hoc satis non esset, ut jejunium absque nimio incommodo sustinere possint. Dicit S. Lig. decem uncias permitti posse Germanis, qui, ob regionis rigorem, majori quantitate cibi indigere videntur; et addit hoc etiam concedendum omnibus qui stomachum habent germanum.

464. — R. ad 3º Quæs. Permittuntur tantum panis, fructus, olera quæcumque, varia dulciaria, et alia similia. Per se, excluduntur pisces, et ea quæ originem ex carne ducunt, ut ova et lacticinia. Sed attendendum est ad varias locorum consuetudines. Sic plerumque ova et lacticinia extra Quadragesimam non amplius prohibentur. Imo in ipsa Quadragesima dispensatio generalis semper conceditur, si forte pauci dies excipientur.

— S. Lig. permittit in cœnula pisciculos, vel exigua partem majoris piscis. Invaluit etiam communis consuetudo ut sumatur offa (*soupe, potage*).

### CASUS VIII.

#### DE JEJUNIO 3º.

CASTOR non semel tantum, sed iterum et sæpius fauces recreat potu vini, cerevisiæ, aut vini meracissimi, innixus hoc axiomate : *Liquidum non frangit jejunium*. Hinc fit ut jejunii molestiam pene nullam sentiat. Imo toties quoties frustulum panis scypho immittit, ne potus noceat. Item tuendæ sanitatis, potius quam recuperandæ gratia, sumit mane præser-tim chocolatum, vel theam, aut cafæum, saccharum, etc., cum frustulo panis, quia hæc per modum medicinæ sumuntur.

HINC :

- QUÆR. 1º Potus vini, vel cerevisiæ, vel alterius liquoris, frangat jeju-nium?  
 2º An liceat sumere mane poculum cafæi, etc.?  
 3º Quid de agendi ratione CASTORIS?

SOLUTIO :

465. — R. ad 1º Quæs. Neg. Liquidum enim non frangit jejunium, juxta communem sententiam. Per liquidum autem intelligitur illud quod præcipue potus rationem habet, et per modum potus ex usu communi su-mitur. S. Lig. n. 1021.

R. ad 2º Quæs. Affirm., si modica quantitas sumatur : constat ex gene-rali consuetudine quæ viget, non solum in Italia, ut testatur S. Lig. n. 1023, sed in plerisque aliis regionibus. Frustum panis etiam cum cafæo vel cum parvo cyatho chocolati addi solet, ita ut tamen quantitas totalis cibi illius duas uncias, præcisa aqua, non excedat. Non licet tamen usum introducere ubi non est. V. Comp. n. 492.

466. — R. ad 3º Quæs. CASTOR virtutem temperantiæ violare potest in potu excedendo, non vero legem jejunii ecclesiastici. Peccat vero fru-stulum panis potui toties quoties superaddendo, et quidem graviter, si id sæpius iterat, quia finis jejunii intrinsecus jam obtineri non posset. Hoc igitur semel tantum in die permitti potest, ut supra dictum est. Vana au-tem est excusatio tua, o CASTOR! *Potus tibi nocet sine cibo*. Remedium facile tibi suadeo: mi bone, a bibendo abstineas. Plus æquo etiam tibi in-dulges, CASTOR mi, chocolatum, saccharum et panem per modum medi-cinæ adeo facile sumendo. Theologi, fateor, concedunt ut tibi liceat sumere electuaria, seu ea quæ rationem medicinæ habent, sed in parva quanti-tate, ita ut stomachus adjuvetur, absque jejunii detimento; verum a peri-culo hallucinationis caveto. Sed qua de causa ipsi pani rationem medicinæ tribuis? Panis est solidus cibus sanorum, non medicina infirmorum.

### CASUS IX.

#### DE JEJUNIO 4º.

MENANDER non raro diebus jejunii, per duas, tres vel quatuor horas prandio cum aliis assistit; interea vero, urbanitatis, aut etiam necessitatis causa, e mensa surgit, exit, cum aliis per medium horam conversatur, etc., reddit, et denuo ac strenue incepsum prandium prosequitur. Alias parum quid, sed sæpiuscule in die comedit. Die quadam, cum jam e mensa sur-ressisset, animo non amplius comedendi, immutata sententia, assedit iterum ut comedaret, ne, ut aiebat, injurius in coquum esse videretur.

HINC :

QUÆR. An MENANDER in casibus expositis jejunium violaverit?

SOLUTIO :

467. — R. MENANDER jejunii legem violat cum refectionem ultra duas horas producit; item cum frequenter in die parum quid comedit. Quando-nam vero graviter peccet, ex cibi quantitate colligendum est. Non videtur graviter peccare, ille qui duas, tres, vel quatuor cibi uncias edit. Billuart ad materiam gravem requirit quantitatem cœnulæ æquivalentem. Non au-tem peccat MENANDER refectionem breviter interrumpendo, v. g. per quar-tam horæ partem, etiam sine ratione. A gravi peccato excusandus est, si

interruptio fiat per horam et etiam amplius; non vero, si interruptio duarum horarum intercedat. Nec videtur peccare, si iterum sedeat ad comedendum postquam e mensa surrexit cum animo non amplius comedendi. *V. Comp. n. 491 et seq.*

## CASUS X.

## CAUSÆ EXCUSANTES A JEJUNIO 1º.

1º MELCHIOR, Confessarius, obligat, *sub gravi*, ad jejunium adolescentes robustos a 18 annis, et omnes qui annum 21 incœperunt, item senes bene valentes, etiam octogenarios, quia lex Ecclesiæ attingit et ligat omnes homines qui illius absolute capaces sunt; damnat Theologos contra sentientes, præsertim illos qui viros sexagenarios et mulieres quinquagenarias a jejunio eximunt; imo et Parochos vel alios qui semi-infirmos dispensant.

2º RUSTICUS, agricola, labori terræ addictus, se accusat quod non jejunaverit, quamvis firma gaudeat valetudine imo quod jejunium aliquando omiserit, licet una die, vel etiam pluribus continuis diebus, a labore abstinuerit. Propterea graviter a Confessario carpitur.

HINC :

QUÆR. 1º *Quinam ad jejunium teneantur?*2º *An, vel quales juvenes, vel senes excusentur?*3º *An a jejunio eximendi sint operarii duris laboribus vacantes, licet optime valeant?*4º *Qui ad varios casus, seu quid de MELCHIORE Confessario, et de RUSTICO agricola?*

SOLUTIO :

468. — *R. ad 1º Quæs.* Fideles omnes, a vigesimo primo anno ætatis completo, tenentur ad jejunium servandum statutis diebus, nisi legitime excusentur vel dispensemur. Constat ex variis Catechismis ab Episcopis approbatis, necnon ex universalis Ecclesiæ consuetudine.

469. — *R. ad 2º Quæs.* Juvenes omnes qui ad ætatem 21 annorum non adhuc pervenerunt, a lege jejunii excusantur, licet robusti sint, ut patet ex dictis.

Omnis senes sexagenarii etiam, *probabiliter*, ab eadem lege eximendi sunt, licet viribus pollere videantur. Ratio est, 1º quia sic fert generalis consuetudo, ut testantur Doctores; 2º quia, alias, res foret nimis scrupulis obnoxia, examinare an aliquis sexagenarius sit sufficienter robustus, necne, ad onus jejunii sustinendum; 3º quia vires in sexagenario paulatim deficiunt, et in interitum prolabuntur. Proinde illorum robur facile illusivum est: *senectus enim, ut fert axioma, ipsa morbus est.* Ita multi contra *alios non paucos*, *S. Lig.* dicit utramque sententiam *probabilem*. Plures eximunt mulieres quinquagenarias a jejunio; sed *S. Ligorius* non audet hoc dicere probabile.

470. — *R. ad 3º Quæs.* *Affirmo probabiliter.* Ratio est, quia consue-

tudo eximit generatim a jejunio eos omnes qui ejusmodi artes exercent. Leges autem non respiciunt id quod raro et *per accidens* evenit, sed in quod *per se et communiter* contingit. *Ita S. Lig. n. 1041. — V. Comp. n. 510.*

471. — *R. ad 4º Quæs.* 1º MELCHIOR, Confessarius, errat, tum urgendo juvenes robustos ad jejunandum ante ætatem 21 annorum, tum obligando ad jejunium septuagenarios vel octogenarios qui robusti videntur; imo et sexagenarios benevalentes, cum hoc controversiæ subjaceat; tum carpendo Theologos contrarium sentientes, et Parochos justa de causa dispensantes: quin potius ipse carpens carpendum est.

2º RUSTICUS nullatenus inquietandus videtur, saltem *probabiliter*, neque ex eo quod omittat jejunium, licet firma gaudeat valetudine, ut patet ex dictis; neque ex eo quod, aliqua die interposita tantum, a labore et simul a jejunio abstineat, juxta communem sententiam; quia ipsi opus est vires reficere, ut sequentes labores sustinere possit, nisi manifeste absque gravi incommodo his diebus jejunare valeat. *S. Lig. n. 1044. — V. Comp. n. 510.*

## CASUS XI.

## CAUSE EXCUSANTES A JEJUNIO 2º.

1º BERNARDUS, concionator egregius, tempore quadragesimali singulis hebdomadis ter quaterve, non minori corporis desfatigatione quam animarum fructu, ad populum dicere solet; gaudet in Domino de laboris sui successu; sed, ut eum facilius prosequi valeat, quotidie sumit alteram refectionem, licet cæteroquin latera firma, naturamque satis robustam a Deo acceperit. Attamen, nonnullis anxietatibus animum ejus pulsantibus, a Theologo inquirit an tutus in conscientia esse possit?

2º MORINUS, theologiae professor, docet omnes sacrarum scientiarum professores, pietatis causa, a jejunio ecclesiastico eximi, etiam diebus quibus scholæ vacant, doctrinamque suam exemplo confirmat. Discipulos autem omnes, non obstante studiorum ratione, ad jejunium rigorose adstringit.

HINC :

QUÆR. 1º *Quid BERNARDO respondendum?*2º *Quid, si in audiendis confessionibus præcipue, vel unice se impenderet?*3º *An professores scientiarum, vel grammaticæ, excusentur a jejunio, an discipuli?*

SOLUTIO :

472. — *R. ad 1º Quæs.* BERNARDO respondebit ipse *S. Ligorius, Hom. ap. tr. 12, n. 34*: « Excusant Doctores a jejunio concionatores qui in « Quadragesima quotidie concionantur, ratione studii et corporis agita- « tionis. Præcipue hoc valet pro missionariis, qui vehementiori agitatione « prædicant. Ita communiter. Cæterum, ex me dico quod sacri conciona-

« tores, qui potius exemplo quam verbis prædicare debent, pro viribus efficere deberent ut jejunium observarent. Nec assentiri possum, generiter loquendo, iis Doctoribus qui etiam excusant eos concionatores qui ter aut quater in hebdomada concionantur. — Attamen plures cum Elbel magis BERNARDO indulgent.

473. — R. ad 2<sup>m</sup> Quæs. Confessarius, *per se*, a jejunio non excusatur; sed, *per accidens* excusari potest, si ad laborem extraordinarium incumbat, ita ut jejunando muneri suo satisfacere non possit. S. Lig. Hom. ap. tr. 12, n. 34, *in fine*.

474. — R. ad 3<sup>m</sup> Quæs. Magistri scientiarum excusantur, etiamsi per unam horam singulis diebus doceant, si magno studio et labore indigent ad lectiones præparandas; non vero si lectiones jam prius ordinatas, vel sæpius repetitas exhibeant. Excusandi sunt etiam *probabiliter* magistri grammaticæ, si in die per quinque horas doceant cum magna defatigatione. Sanchez. — Azorius, etc. Discipuli autem excusandi non sunt a jejunio, generatim loquendo; quia ad studium adeo arduum non tenentur, vel de eo aliquid remittere possunt. Videntur tamen excusandi si secus studium necessarium vel magni momenti tempore Quadragesimæ omittere deberent. Azor. — Castropalao.

### CASUS XII.

#### EXCUSATIO A JEJUNIO 3°.

STRIGONIUS nollet sane jejunii legem infringere, licet ea valde ipsi onerosa sit. Sed ecce! industriam excogitavit qua tum liberius stomacho indulget, tum a peccato immunis evadat. Quomodo faciet? accipe multifariam calliditatem: 1º Aliquando suscipit durum laborem sibi prorsus insuetum, et jam propter nimiam defatigationem impotens ad jejunandum efficitur. 2º Alias pergit tota die ad venationem valde arduam per montes et saltus et valles, nec proinde jejunare valet. 3º Alias piam suscipit peregrinationem pedester, pro qua peragenda 15 vel 20 milliaria percurrere debet, et iterum a jejunio ob impotentiam saltem moralem excusatur.

HINC :

QUÆR. 1º An labor insuetus susceptus ex causa honesta, vel etiam indifferentia, a lege jejunii excuset?

2º An pia peregrinatio, longa et pedibus suscepta, a jejunio liberet?

3º An STRIGONIUS a jejunio sit immunis in prædictis casibus?

SOLUTIO :

475. — R. ad 1<sup>m</sup> Quæs. Neg. *per se* loquendo, seu, nisi adsit aliqua ratio gravis determinans ad laborem suscipendum, v. g. aliqua necessitas sua vel aliena, occasio lucri extraordinarii, etc... Ratio est, quia, ad se exendum a gravi obligatione, requiritur ratio proportionate gravis. Ergo non sufficit causa simpliciter honesta, vel indifferens, ut est ratio recreationis, v. g. ad venandum, ludendum pila, ad itinerandum pro invisendis cognationibus.

tis aut amicis, etc... Si quis, suscepto illo labore, sit adeo defatigatus ut jejunare nequeat, non tenetur quidem ad jejunandum; sed graviter peccavit ponendo causam proximam jejunium impedientem, si impedimentum præviderit. Secus vero dicendum de iis qui exercent artes laboriosas cum jejunio insociabiles; quia damnum grave subirent, si a labore consueto abstinere deberent, quoties jejunandum est. S. Lig. n. 1046. — V. Comp. n. 511.

476. — R. ad 2<sup>m</sup> Quæs. Neg. *per se*, quia ratio pie peregrinandi non est causa necessaria, neque valde gravis, saltem si pia hæc peregrinatio ad aliud tempus remitti possit. Excusat S. Lig. n. 1048, peregrinationem ad loca sacra susceptam in magnum Dei honorem, aut communem ædificationem valde notabilem, v. g. si peregrini sint magnæ auctoritatis. Attamen, si peregrinatio jam suscepta fuerit, et interim dies jejunii occurrat, non est obligatio eam intermittendi, ut jejunium servetur. S. Lig. ibid. et alii communiter.

477. — R. ad 3<sup>m</sup> Quæs. STRIGONIUS in nullo ex dictis casibus excusari potest a jejunii obligatione ob duplē rationem, scilicet: 1º Quia egit in fraudem legis; *fraus autem nemini patrocinari debet*. Etenim apposuit causam directam ad legem jejunii eludendam; porro nunquam licet apponere impedimentum *directe* impediens aliquam obligationem; seu, nunquam licet agere cum *directa intentione* legem omittendi. Nam, dum aliquis subjecet imperio legis, non potest velle eam infringere, cum talis voluntas jam sit ipsius legis violatio. V. Comp. de Leg. n. 110. 2º Quia, etiamsi STRIGONIUS non poneret causam *directe* impedientem jejunium, sed ex alio fine laborem susciperet, attamen non excusaretur ob defectum rationis proportionate gravis, ut jam dictum est.

### CASUS XIII.

#### ABSTINENTIA A CARNE 1°.

1º NICODEMUS, absque scrupulo, frustulum unum vel alterum carnis, diebus prohibitis, manducat; quia, ait, *parum pro nihilo reputatur*. — Alias facile comedit pulmentum, offam, aut lactucas, jure ex carne, aut sagimine, vel larido liquato conditas; nec in hoc graviter peccare putat, quia carnes solæ præcise ab Ecclesia prohibentur. Alias carnes reliquias ex convivio die Jovis instaurato, die sequenti comedit, quia in diem Dominicam asservari nequeunt.

2º PERPETUA, paupercula, confitetur se præparasse pro se suisque prolibus cibum sagimine conditum diebus prohibitis, ex eo quod butyrum nec oleum habuerit; item se manducasse frustula carnis in eleemosynam accepta. A Confessario graviter reprehenditur.

HINC :

QUÆR. 1º Quænam sit materia gravis vel levis in hac lege?

2º Quænam sint carnes prohibitez?

3º Quid de NICODEMO? Quid de cauponibus qui die Veneris carnis reliquias comedunt?